

O Dujto Poslanie taro Petar

Pozdrav

1 ¹ O Simon Petar, sluga hem apostoli e Isuse Hristoskoro, džiko okola, kola preku i pravda amare Devleskiri hem Spasiteli o Isus Hristos priminge isto skapoceno vera sar hem amen; ² o blagodat hem o mir te umnožinelpes ko pendžariba e Devle hem e Isuse, amaro Gospodari.

Ov dengjamen sa soj amenge potrebno

³ Soske Leskiri Devlikani sila dengjamen sa soj amenge tano potrebno baši život hem pobožnost, preku pendžariba Okole, koj povikujngjamen preku Pli sopstveno slava hem šukaripa, ⁴ soleja amenge dendo skapocena hem najbare vetovanja, ta preku olende te oven učesnikja e Devleske ki priroda, otkoga našlen taro rumimo životo, kovaj tano ko sveto, preku pogrešna strastia, kola vladinena ko sveto;

⁵ baši odova den sa tumendar hem ispolninen tumari vera šukaripaja, a o šukaripa e džandipaja, ⁶ a o džandipa so vozdržlivost, a o vozdržlivost so trpenie; a o trpenie so pobožnost; ⁷ a o pobožnost phralikane mangipaja; a o phralikano mangipa mangipaja. ⁸ Soske ako isitumen sa adava hem adava umnožinelape, na kjerela tumen mrzliha hem neplodna ko pendžariba amare Gospodare e Isuse Hristo. ⁹ Ama, kas nae odova, koroloj tano hem kratko dikhela: soske bistergja deka tano očistimo taro ple purane grevia.

¹⁰ Odoleske phrajljalen, pogrižinen tumen panda poviše te zacvrstinen tumaro poziv hem izbor. Ustvari, ako kjerena odova nikogaš nae te sopninen tumen. ¹¹ Soske agjar ka delpe tumenge izobilno te khuyen ko večno carstvo amare Gospodareske hem Spasiteli o Isus Hristos.

¹² Odoleske ka dikhav sekogaš te potsetinav tumen baši akala bukja, iako džanena tumen, hem sijen utvrdime ko avdosutno čačipa. ¹³ Ama mislinava deka tano pravo džikote sijum ko akava šatori ko mlo telo, te džangavav tumen opomenibaja, ¹⁴ soske džanava deka skoro ka mukav mlo šatori, sar so izvestingjama baši odova amaro Gospodari o Isus Hristos, ¹⁵ a ka nastojnav tumen, hem palo mlo džajbe, te spomninen sekogaš baši akava.

Dikhlem Oleskoro baripe

¹⁶ Soske koga objavingem tumenge i sila hem o ajbe amare Gospodareskoro o Isus Hristos, amen na sledingem lukava izmislime bajkje, ama ulem očevdicia baši Oleskoro baripe, ¹⁷ soske Ov primingja taro Devel o Dat čest hem slava, koga tari veličestveno slava alo Leske o glaso: „Akavaj tano Mlo manglo Čhavo, ki Kaste Mi milina tani.“ ¹⁸ Amen šungem o glaso, koj alo taro nebo, koga sijem sine Oleja ki sveto gora.

¹⁹ Hem agjar isiamen pocvrsto proročko slovo, a tumen kjerena šukar so pazinena ki leste, sar svetilo so svetinela ko temno than, džikote na pravgjola o dive hem i Denica zasvetingja ko tumare srcia. ²⁰ Džanen akava angleder o sa: ni jek proroštvo ko Sveto Pismo našti te tolkujnelpe koj sar mangela, ²¹ soske nikogaš o proroštvo na alo tari manuškani vojlla, nego o sveta Devleskere manuša kjerena sine lafi vodime taro Sveti Duh.

Hovavne prorokja

2 ¹ A sine da hem hovavne prorokja ko narodo, sar so ka ovel hem maškar tumende hovavne učitejlja, kola tajno ka anen uništibaskere bange verovanja hem ka odrekujnen e Gospodare, Koj kingjalen, lena upri peste sigate uništiba, ² hem but džene ka džan palo lengoro rumimo drumo, baši kaste ka hulinelpe o drumo taro čačipa. ³ Hem ko alčnost ka iskoristinen tumen izmislime lafencar, ama lengoro osuduvanje tano odamna gotovo hem lengoro propast na dreminela.

⁴ Soske ako o Devel na poštedingja e angelen kola grešinge, nego predengjalen ko okovia e mrakoskere, frdingjalen ko pekol za da te oven odothe arakhle sa džiko sudo; ⁵ hem ako na poštedingja o purano sveto, nego pazingja samo e Noe, o propovedniko e pravdakoro, panda evta dušencar, koga muklja potop upro o bezbožničko sveto; ⁶ ako osudingjalen ko propast o gradia o Sodom hem o Gomor hem kjergjalen ko pravo, hem postajngjalen za primer baši o idna bezbožnikja; ⁷ hem ako izbavingja e pravedniko o Lot, kas so mučinelna sine o rumimo život e bezakonikongoro, ⁸ soske akava pravedniko, živibaja maškar olende, mučinelna sine taro dive ko dive pli pravedno duša, dikhibaja hem šunibaja olengere bezakonska dejlja – ⁹ odova značinelna deka o Gospodari džanela sar te izbavinel e pobožna manušen taro iskušenie, a e nepravednon te pazinelen baši kaznibaske džiko dive e sudoskoro; ¹⁰ a osobeno okola, kola džana palo nečista pohote e teloskere, hem na mangena o avtoriteti e Devlipaskoro. Sar drska hem ki pli vojlla manuša ola na

darana te hulinen o veličestva, ¹¹ džikote o angejlja, kolaj tane pobare ki sila hem snaga, na izgovorinena hulna osuda protiv olende anglo Gospodari.

¹² A akala, sar nerazumna životnia, kolaj ki priroda opredelime te oven lovime hem mudarde, hulinen ko okova so na džanenale, hem korkori ka mudargjovent ko plo razvrat, ¹³ ka dobinen kazna baši nepravda. Ola računinena o rumimo životo diveskoro baši plo zadovolstvo, melale hem ladžake tane ola, kola uživinena ple hovajbaja koga ugostinenape tumencar. ¹⁴ Olengere jajkha pherde so preljuba hem na cidenapes taro grevo; ola hovavena o neutvrđime duše. Isilen srce sikavdo ko alčnost; olaj tane čhave e prokletstvoskere.

¹⁵ Mukle o čačikano drumo hem našavsalile, hem gele palo drumo taro Valaama, o čhavo taro Vosorov, koj manglja nepravdedno plata, ¹⁶ ama primingja ukor baši plo bezakonie: laloro her so kjerela lafi ko maniškano glaso hem sprečingja e prorokskoro delinipa.

¹⁷ Odolaj tane izvojra bizo pani hem oblakja so ingarelalen i bura; baši kaske so pazinelape temno mrako zasekogaš. ¹⁸ Soske odoleja so kjerena ko baro hem ko čučo lafi, hem suetna lafia hovavenalen preku telesna strasna želbe hem preku ple rumime bukja okolen, kola samo so našle taro okola koj živinena ki zabluda; ¹⁹ obečinena lenge sloboda a korkori robia baši rumime bukja, soske nekoj taro soj tano pobedimo, hem odoleske tano robo.

²⁰ Ako ola čače cidingepes taro melale navike taro akava sveto koga pendžarge baši amaro Gospodari hem Spasiteli o Isus Hristos, hem akana palem pletkinenape ki stapica taro rumimo životo hem pretrpinena poraz, togaš olengiri avdisutni sostojba tani pološno tari okoja ko početok. ²¹ Ustvari, baši olenge ka ovel sine pošukar tena pendžaren sine o drumo e pravdakoro, otkolku otkoga pendžargele, te iranenpe tari sveto zapoved koja olenge tani predajmi. ²² Olenge slučinelape okova so vakjerela i vistinsko pogovorka, 'O džukel iranelape ko plo čhadiba,' hem 'O nangjardo balo iranelape te valkajnelpe ki čik.'

O Posledna Dive

3 ¹ Mangljalen, akavaj tano vekje dujto poslanie, so pišinava tumenge, hem ko solduj džangavavale, preku potsetiba, tumaro čisto razum, ² za da te spomninen tumenge baši o lafia kova o sveta prorokja vakjergelen angleder, hem

baši i zapoved e Gospodareskiri hem Spasiteli, koja predajngela tumenge tumare apostojlja.

³ Džanen angleder o sa akava: deka ko posledna dive ka javinenpes manuša so ka khelenpes e čačipaja, kola pe ple khelibaja ka džan palo ple sopstvena strastia hem ka vakjeren: ⁴ „Kaj tano o vetuvanje baši Leskoro ajbe? Soske otkoga mule o dada sa tergjola agjar, sar taro početok taro sozdavanje.“

⁵ Koga ki pli vojlja mangena agjar, togaš baši olenge ačhola garavdo deka preku e Devleskoro slovo i nebesa sine odamna, hem deka i phuv taro pani hem preku o pani dobingja o postoejne, ⁶ preku odova hem o togašno sveto sine potopimo pajneja hem agjar propadingja. ⁷ A o avdosutne nebesia hem i phuv e isto slovoja zapazime, hem arakhenape baši jag džiko dive e sudoskoro hem propast baši o bezbožna manuša.

E Gospodareskoro Dive

⁸ Ama jek na smejnela te ovel tumenge nepoznato, mangljalen, deka baši o Gospodari jek dive tano sar iljada berš, hem iljada berš sar jek dive. ⁹ O Gospodari na dugovlačinela odova so obečingja, sar so nekoj mislinena baši odova bavno, nego sikavela Plo trpenie ki tumende, soske na mangela nekoj te propadinel, nego sarine te aven džiko pokajanie.

¹⁰ A e Gospodareskoro dive ka avel sar čor rakjate; ko odova dive o nebesia ka nakhen bare bučavaja, hem sa o bukja so isi ki phuv jagaja ka raspadinenpe hem i phuv ka thabljol sa e deloncar soj ki late.

¹¹ Soske sa akava ka raspadinelpes agjar, save trebela te oven te vodinen sveto životu hem ko pobožnost, tumen ¹² kola očekujnena hem sigjakjerena o ajbe baši e Devleskoro dive, koga o tharde nebesia ka raspadinenpes hem sa o bukja so isi ki phuv jagaja ka topinenpes? ¹³ A amen, spored Leskoro vetuvanje, očekujnaja neve nebesia hem nevi phuv ki koja živinela i pravda.

Posledna lafia

¹⁴ Odoleske, mangljalen, džikote očekujnena akava, pogrižinen tumen Ov te arakhel tumen čista hem neporočna ko mir, ¹⁵ a o dolgotrpelivost amare Gospodareskoro računinenle sar spasenie, sar so hem amaro manglo phral o Pavle pišingja tumenge, spored soj dendi leske i mudrost; ¹⁶ sar so hem ko sa ple lila vakjerela baši akava; ki

lende isi nesave phare te haljonpe bukja, kola o neučime hem neutvrdime iranena naopaku, hem o javera Pismia, baši plo uništiba.

¹⁷ Hem agjar tumen, mangljalen, koga džanena akava angleder, pazinen tumen i zabluda taro bezakonikja tena povlečinel tumen ki peste hem tena preperen tari tumari cvrsto položba, ¹⁸ nego bajroven ki blagodat hem ko pendžariba amare Gospodare hem Spasitele o Isus Hristos. Oleske slava hem akana hem ko dive taro večnost. Amin!